

四庫全書

集部

欽定四庫全書

御定佩文齋詠物詩選卷三百六十九

杜若花類

五言古

詠杜若

梁沈約

生在窮絕地豈與世相親
不顧逢采擷本欲芳幽人

五言絕句

池上亭

唐錢起

臨池構杏梁待客歸煙塘水上褰簾好蓮開杜若香

七言絕句

六月二十七日望湖樓醉書 宋 蘇軾

獻花遊女木蘭桹細雨斜風濕翠翹無限芳洲生杜若
吳兒不識楚詞招

題畫圖

元 陳旅

雨餘空翠轉霏霏杜若洲邊小艇歸又為故人臨野閣
江雲日暮濕秋衣

謾成

元馬臻

蕭蕭野老髮垂肩
家住湖西杜若煙
載得芰根入城賣
西風落日滿歸船

望武昌

明楊基

吹面風來杜若香
離離煙柳拂鷗長
人家鸚鵡洲邊住
一向開門對漢陽

越江曲

明梁有譽

橫塘風起送新涼
蒲葉拍波江水長
莫道春歸花落盡

中流還有杜蘅香

御定佩文齋詠物詩選卷三百六十九

欽定四庫全書

御定佩文齋詠物詩選卷三百七十

菖蒲類

五言古

菖蒲

闕名

石上生菖蒲一寸八九節
仙人勸我餐令人好顏色

樂府體

唐曹鄴

蓮子房房嫩菖蒲葉葉齊
共結池中根不厭池中泥

和子由記園中草木

宋 蘇軾

自我來關輔南山得再遊山中亦何有草木媚深幽
菖蒲人不識生此亂石溝山高霜雪苦苗葉不得抽
下有千歲根蹙縮如蟠蚪長為鬼神守德薄安敢偷

菖蒲

宋 裴萬頃

匡廬入吾懷十載馳夢魂踵門者何人遺余以芳蓀
歡然得其趣如對五老言幽姿出巖谷常帶冰雪痕
塵容為一洗兩目不復昏忽思三峽流褰衣涉潺湲
因仍一

寸石浸潤九節根人言可扶老歲月須其蕃茲理諒不
誣吾將從綺園

效孟郊體

宋謝翱

手持菖蒲葉洗根澗水涓雲生巖下石影落莓苔枝忽
起逐雲影覆以身上衣菖蒲不相待逐水流下谿

長短句

寄菖蒲

唐張籍

石上生菖蒲一寸十二節仙人勸我食令我頭青面如

雪逢人寄君一絳囊書中不得傳此方君能來作棲霞
侶與君同入丹元鄉

七言律

和子由盆中石菖蒲忽生九花

宋
蘇軾

春蕖秋莢兩須臾神藥人間果有無
無鼻何由識蒼筤
有花今始信菖蒲芳心未飽兩蛺蝶
寒意知鳴幾蟪蛄
記取明年十二節小兒休更簫霜鬚

五言絕句

雜興

唐
陸龜蒙

桃李傍簷楹無人賞
春華時情重不見卻憶菖蒲花

石菖蒲

宋
王十朋

天上玉衡散結根
泉石間要須生九節長為駐紅顏

過紫微菴訪馮道士

元
薩都拉

道士愛幽居
年來一事無
盆池新雨過
石上種菖蒲

七言絕句

送顧非熊秀才歸丹陽

唐王建

江城柳色海門煙，欲到茅山始下船。
知道君家當瀑布，菖蒲潭在草堂前。

寄茅山孫鍊師

唐李德裕

石上谿蓀發紫茸，碧山幽靄水溶溶。
菖花定是無人見，春日唯應羽客逢。

贈常州報恩長老

宋蘇軾

碧玉盤盛紅馬腦，井花水養石菖蒲。
也知法供無窮盡，

試問禪師得飽無

採菖蒲

宋 陳與義

閒行澗底採菖蒲
千歲龍蛇抱石臞
明朝却覓房州路
飛下山顛不用扶

寄謝劉彥集菖蒲之貺

宋 朱子

君家蘭杜久萋萋
近養菖蒲綠未齊
乞與幽人伴岑寂
小窗風露日低迷

謝吳公濟菖蒲

朱子

翠羽紛披一尺長帶煙和雨過書堂知君別有臞仙種
容易難教出洞房

御定佩文齋詠物詩選卷三百七十

欽定四庫全書

御

定佩文齋詠物詩選卷三百七十一

芭蕉類

附美人蕉

五言古

芭蕉贊

宋

謝靈運

生分本多端芭蕉知不一含萼不結核敷華何由實至
人善取譬無宰誰能律莫昵緣合時當視分散日

甘蕉

梁沈約

抽葉固盈丈，擢本信兼圍。流甘掩椰實，弱縷冠絺衣。

紅蕉

唐
柳宗元

晚英值窮節，綠潤含珠光。以茲正陽色，窈窕凌清霜。遠物世所重，旅人心所傷。迴暉眺林際，戚戚無遺芳。

芭蕉

唐
杜牧

芭蕉為雨移，故向窗前種。憐渠點滴聲，留得歸鄉夢。夢遠莫歸鄉，覺來一翻動。

詠池上芭蕉

明
袁凱

亭亭虛心植冉冉繁陰布既掩猗蘭砌還覆莓苔路卷
舒今自知衰榮隨所寓默契方在茲臨軒挹清醕

蕉石亭

明
顧璘

怪石如筆格上植蕉葉青蒼然太古色得爾增娉婷欲
攜一斗墨葉底書黃庭拂拭坐盤薄風雨秋冥冥

五言排律

詠蕉

明
徐桂

根自蘇臺徙陰生蔣徑幽當空炎日障倚檻碧雲流未

展心如結微舒葉漸抽
瑣窗迷翠黛張幕動青油
書借臨池用光分汗簡
留流甘掩中土為綌衣
南州只益莓苔潤翻令
蕙若憂荷風同委露梧
葉共鳴秋夢境知誰
得人生似爾浮漫勞彈
事苦終日傍林丘

七言律

書庭蕉

明

王守仁

簷前蕉葉綠成林
長夏全無暑氣侵
但得雨聲連夜靜
何妨月色半牀陰
新詩舊葉題將滿
老菱疎桐恨轉深

莫笑鄭人談訟鹿至今醒夢兩難尋

詠芭蕉

明張縉

長葉翩翻綠玉叢
植來況是近梧桐
美人閒立秋風裏
羈客孤眠夜雨中
情逐舞鸞偏易感
事隨夢鹿渺難窮
太湖石畔新涼院
何處吹簫月滿空

七言排律

戲題陰涼室階前芭蕉

明僧良琦

新種芭蕉繞石房
清陰早見落書牀
根霑零露北山潤

葉帶濕雲南澗涼得地初依蒼石瘦抽心欲並綠筠長
雨聲夜響顛崖瀑晴碧朝浮海日光樗櫟自慚全壽命
榲楠合媿託巖廊觀身政憶維摩語草字寧追懷素狂
白晝棲遲吾計拙青霄偃仰汝身強歲寒要使交期在
莫畏空山有雪霜

五言絕句

芭蕉

唐
路德延

一種靈苗異天然體性虛葉如斜界紙心似倒抽書

芭蕉

宋 朱子

芭蕉植秋檻勿云憔悴姿與君障夏日羽扇寧復持

紅蕉

朱子

弱植不自持芳根為誰好雖微九秋幹丹心中自保

齋前芭蕉

明 高啟

靜遶綠陰行閒聽雨聲卧還有感秋詩窗前書葉破

為友人寫蕉

明 沈周

便欲開船去因君更寫蕉要知相憶地葉上雨瀟瀟

題美人蕉

明
皇甫汈

帶雨紅妝濕迎風翠袖翻
欲知心不卷遲暮獨無言

七言絕句

紅蕉

唐
徐凝

紅蕉曾到嶺南看較小芭蕉
幾一般差是斜刀剪紅絹
卷來開去葉中安

蕉葉

唐
徐黃

綠綺新裁織女機擺風搖日影
離披只應青帝行春罷

閒倚東牆卓翠旗

未展芭蕉

唐錢珣

冷燭無煙綠蠟乾
芳心猶卷怯春寒
一緘書札藏何事
會被東風暗拆看

雜題

宋王安石

紫燕將雛語夏深
綠槐庭院不多陰
西窗一夜無人問
展盡芭蕉數尺心

芭蕉

宋張載

芭蕉心盡展新枝
新卷新心暗已隨
願學新心養新德
旋隨新葉起新知

詠芭蕉

宋 楊萬里

骨相玲瓏透八窗
花頭倒插紫荷香
繞身無數青羅扇
風不來時也自涼

題樂靜軒

明 王紱

竹几藤牀小硯屏
薰風簾幕篆煙青
閒齋幾日黃梅雨
添得芭蕉綠滿庭

芭蕉美人

明
夏寅

曉妝纔罷思徘徊
羅襪輕移步綠苔
試向芭蕉問春信
一緘芳札爲誰開

題蕉

明
沈周

慣見閒庭碧玉叢
春風吹過即秋風
老夫都把榮枯事
却寄蕭蕭數葉中

府江雜詩

明
謝少南

冬炎卉木未蕭條
暫倚蓬窗旅况銷
樹架綠垂君子蔓

崖林紅破美人蕉

雨蕉

明
湯顯祖

東風吹展半廊青
數葉芭蕉未擬聽
記得楚江殘雨夜
背燈人語醉初醒

御定佩文齋詠物詩選卷三百七十一

欽定四庫全書

御定佩文齋詠物詩選卷三百七十二

石竹花類

五言古

魏倉曹宅各賦一物得當軒石竹

唐李頎

羅生殊衆色獨為華表滋雖雜蘭蕙處無爭桃李時同人趨府暇落日後庭期密葉散紅點靈條驚紫蕤芳菲

看不厭採摘願來茲

詠石竹

宋張耒

真竹乃不花爾獨豔暮春何妨兒女眼
謂爾勝霜筠世無王子猷豈無知竹人
粲粲好自持時來稱此君

五言律

答李滁州題庭前石竹花見寄

唐獨孤及

殷疑曙霞染巧類匣刀裁不怕南風熱
能迎小暑開遊

蜂憐色好思婦感年催覽贈添離恨愁腸日幾迴

雲陽寺石竹花

唐
司空曙

一自幽山別相逢此寺中高低俱出葉深淺不分叢野
蝶難爭白庭榴暗讓紅誰憐芳最久春露到秋風

七言律

賦石竹

元
虞集

積雪初消萼綠華東風吹動絳綃霞龍嘯石氣千年潤
鶴過林陰一徑斜刻字欲尋金錯落析旌如織翠交加

綺窗坐對吹笙煖未覺人間歲月賒

五言絕句

石竹花

唐
皇甫冉

數點空階下間疑細雨中那能久相伴嗟爾滯秋風

七言絕句

石竹花詠

唐
陸龜蒙

曾看南朝畫國娃古羅衣上散明霞而今莫共金錢鬪
買却春風是此花

石竹


宋 王安石

麝香眠後露檀勻
繡在羅衣色未真
斜倚細叢如有意
冷搖數朶欲無春

賦石竹

元 蒲道源

短籬新見出梢梢
蔥蒨都無尺許高
茜色芳葩工點綴
莫教容易混蓬蒿



御定佩文齋詠物詩選卷三百七十二

欽定四庫全書

集部

御定佩文齋詠物詩選卷三百八十五

詳校官侍郎_臣李封

主事銜_臣徐以坤覆勘

總校官檢討_臣何思鈞

校對官中書_臣高 中

謄錄監生_臣張丹崑

欽定四庫全書

御定佩文齋詠物詩選卷二百七十三

葉類

五言古

落葉

隋孔紹安

早秋驚落葉飄零似客心
翻飛未肯下猶言惜故林

落葉

明王問

枕上聞朔風夜半聲策策曉來鱗
林空落葉卷庭石乘

運固其然芳菲豈自惜悟彼歸根言獨與至人說

落葉

明徐良彥

落葉不上枝因風亦復起清風若無私何因有彼此一
葉隨飄揚一葉沾泥滓寄語風前葉莫墮東流水多謝
三春風山中多蘭芷

長短句

落葉行

元吳師道

山窗獨眠抱秋冷四壁無聲中夜醒天清急雨忽萬點

月出枯虵紛衆影開門颯颯非故林滿空飛葉搏愁陰
石澗流紅細泉咽蘚痕掩碧孤蛩吟高秋共誰聽蕭瑟
却憶江南遠遊客楚天搖落白日高萬里扁舟蕩春色
江南客來歸山中葉亦稀相思繞遍寒樹下有恨願隨
秋風吹山空夜寒風漸微慘慘霜露霑人衣征鴻獨叫
殘雲飛

五言律

和杜錄事題紅葉

唐白居易

寒山十月旦霜葉一時新似燒非因火如花不待春連
行排絳帳亂落剪紅巾解駐籃輿看風前唯兩人

聞落葉

唐僧齊己

楚樹霜晴後蕭蕭落晚風因思故園夜臨水幾株空煮
茗燒乾翠行苔踏爛紅來年未離此還見碧叢叢

隕葉

唐僧無可

遶巷夾谿紅蕭條逐北風別林遺宿鳥浮水載鳴蟲石
小埋初盡枝長落未終帶霜書牋什閒讀白雲中

賈葉

元僧善住

霜後色初變風高始亂零
和雲流遠澗雜雨下空庭
掃處兼僧影燒時帶鶴翎
翻思在春日繞屋政青青

賦蜘蛛落葉

明許繼

秋氣感木葉故林飄墜時
不成棲蔓草還復綴蛛絲
屢舞涼風得高懸落照宜
多情似畱戀爭奈已辭枝

賦得窗中度落葉

明莫是龍

綺疏臨野渡秋樹響前林
颯颯含風入紛紛逗雨深
拂

來紅袖掩積處綠塵侵誰送哀蟬曲無端攪客心

窗中度落葉

明 張文柱

裊裊回風下蕭蕭薄歲陰一山方隱几片雨自前林重
以輕霜色淒其入曲心高居尚搖落不敢更登臨

見落葉

明 王 醇

朝來見落葉因悔向林行飛鳥不無意何人非有生枝
容昨夜月秋減一邨聲轉禁樵童入留茲長道情

落葉

明 僧宗泐

一片復一片西風與北風
但看階下滿不覺樹頭空
綴服猶堪用題詩自不工
山童朝更掃閒委古牆東

五言排律

一葉落

唐薛能

輕葉獨悠悠天高片影流
隨風來此地何樹落先秋
變色黃應近辭林綠尚稠
無雙浮水面孤絕落闌頭
乍減誠難覺將凋勢未休
客心空自比誰肯問新愁

七言律

紅葉

唐 吳融

露溼霜乾片片輕
斜陽照處轉烘明
和烟飄落九秋色
隨浪泛將千里情
幾夜月中藏鳥影
誰家庭際伴蛩聲
一時衰颯無多恨
看著春風綵剪成

紅葉

明 徐渭

纔見芳華照眼新
又看紅葉點衣頻
只言春色能驕物
不道秋霜解媚人
宮水正寒愁字字
吳江初冷錦鱗鱗
更餘一種閒風景
醉雜黃花野老巾

七言排律

楓林

明

于若瀛

禁城玉樹漸秋深，楓色淒淒滿上林。
萬片作霞延日麗，幾株含霧苦霜吟。
斜連雙闕輝青瑣，倒影平津映碧潯。
歧葉著飈聲瑟瑟，殷紅過雨色沈沈。
雜黃間綠緣成錦，委砌飄簷埒作金。
向夕轉深嬌落照，因風散響怖棲禽。
城頭迴接青岑遠，殿角寒生繡幄陰。
幾度朝昏勞悵望，徘徊故苑倍蕭森。

五言絕句

奉和元日賜羣臣柏葉

唐李乂

勁節凌霜勁芳心待歲芳能令益人壽非止麝含香

奉和元日賜羣臣柏葉

唐趙彥昭

器乏雕梁器材非構厦材但將千歲葉常奉萬年杯

奉和元日賜羣臣柏葉

唐武平一

綠葉迎春綠寒枝歷歲寒願持柏葉壽長奉萬年歡

落葉

唐王建

陳綠尚參差初紅已重疊中庭初掃地繞樹三兩葉

醉中對紅葉

唐白居易

臨風杪秋樹對酒長年人醉貌如霜葉雖紅不是春

江上楓

唐成彥雄

江風自蕭瑟不競松筠力一葉落漁家斜陽帶秋色

龍興道中

宋晁沖之

澗道垂黃花山城擁紅葉人爭小舟渡馬就平沙涉

閒題樹葉上

元馬祖常

秋意鳳城多涼颭奈夜何題詩滿霜葉不見洞庭波

題黃子久小畫

明高啟

谿水雖多曲舟行不憚賒山山秋葉赤猶復似桃花

蘭葉

明張羽

泛露光偏亂含風影自斜俗人那解此看葉勝看花

七言絕句

王起居獨遊青龍寺翫紅葉因寄

唐羊士諤

十畝蒼苔遶畫廊
幾株紅樹過清霜
高情還似看花去
閒對南山步夕陽

山行

唐杜牧

遠上寒山石徑斜
白雲生處有人家
停車坐愛楓林晚
霜葉紅於二月花

秋行

宋徐璣

紅葉枯梨一兩株
儵然秋思滿山居
詩懷自嘆多塵土
不似秋來木葉疎

落葉

宋 宋伯仁

卷地西風促雨來，掃除黃葉滿蒼苔。
垂楊已有青青眼，只礙梅花未敢開。

秋

宋 裘萬頃

數聲牧笛日將晚，一曲樵歌山更幽。
解帶盤桓小谿上，坐看紅葉泛清流。

楓葉

宋 朱淑真

江空木落雁聲悲，霜入丹楓百草萎。
蝴蝶不知身是夢，

又隨春色上寒枝

邨居

金馬定國

柿葉經霜菊在谿
天寒落日見難棲
西家有客薦新酒
紅葉蕭蕭葢芋畦

江天秋晚圖

金王繪

萬頃波間踏浪兒
瀟湘秋晚趁歸時
四山紅葉風聲健
散入儂家款乃詞

雜詩

金劉豫

古渡停驂日向沈淒涼歸思梗清吟碧山幾點塞天濶
紅葉一林秋意深

山園梨葉有青紅相半者戲作一詩

金
元德明

霜輕霜重偶然中一葉雖殊萬葉同不信世間閒草木
解隨兒女作青紅

題高氏所藏畫圖

元
陳旅

誰家林麓近谿灣高樹扶疎出石間落葉盡隨谿雨去

只留秋色滿空山

無題

元朱德潤

索索西風白露零
隔林砧杵助秋聲
欲尋隱者門前路
落葉漫山礙屐行

泊閭門

元顧瑛

楓葉蘆花暗畫船
銀箏斷絕十三絃
西風只在寒山寺
長送鐘聲攪客眠

山居吟

元僧清珙

深秋時節雨霏霏
蘇葉層層印虎蹄
一夜西風吹不住
曉來黃葉與階齊

題紅葉仕女

明談震

初試宮妝步玉除
詩成把筆更躊躇
舊愁新恨知多少
盡向霜紅葉上書

柏坊驛題壁

明姚汝循

風雨蕭蕭滯客程
荒亭獨宿峭寒生
今宵羈思知多少
聽盡千山墮葉聲

賦得千山紅樹送人

明 柳應芳

蕭蕭淺絳霜初醉
撼撼深紅雨後然
染得千林秋一色
還家只當是春天

題扇送客懷長蘆湖上

明 程嘉燧

送客西樓落木風
鬢絲吹斷酒巾空
危廊斜日雲居寺
霜葉仍欺二月紅

玉岑閒行口占

明 李流芳

玉岑山脚水縈洄
寒日暉暉下稻堆
穿過松岡尋法相

滿空黃葉打頭來

石門

明
廖孔說

石門酒薄客愁寬
誰念霜谿曉被寒
偶見隣舟說紅葉
五更疎雨夢長干

御定佩文齋詠物詩選卷三百七十三

欽定四庫全書

御定佩文齋詠物詩選卷三百七十四

雜樹類

五言古

詠疏楓

梁簡文帝

萎綠映葭青
疏紅分浪白
花葉灑行舟
仍持送遠客

植靈壽木

唐柳宗元

白華鑒寒水
怡我適野情
前趨聞長老
重復欣嘉名
蹇

連易衰朽方剛謝經營敢期齒杖賜聊且移孤莖叢萼
中競秀分房外舒英柔條乍反植勁節常對生循翫足
忘疲稍覺步武輕安能事翦伐持用資徒行

宥老楮

宋
蘇軾

我牆東北隅張王維老穀樹先樗櫟大葉等桑柘沃流
膏馬乳漲墮子楊梅熟胡為尋丈地養此不材木蹶之
得與薪規以種松菊靜言求其用畧數得五六膚為蔡
侯紙子入桐君錄黃繒練成素黥面頰作玉濯灑蒸生

菌腐餘光吐燭雖無傲霜節幸免狂醒毒孤根信微陋
生理有倚伏投斧為賦詩德怨聊相贖

五言律

題椰子樹

唐
沈佺期

日南椰子樹香裊出風塵叢生調木首圓實櫝榔身玉
房九霄露碧葉四時春不及塗林果移根隨漢臣

同李郎中淨律院梔子樹

唐
包何

木梔稀難識沙門種則生葉殊經寫字子為佛稱名瀘

水澆新長燃燈煖更榮亭亭無別意只是勸修行

五言排律

興善寺貝多樹

唐張喬

還應毫末長始見拂丹青得子從西國成陰見昔朝勢
隨雙刹直寒出四牆遙帶月啼春鳥連空噪暝蜩遠根
穿古井高頂起涼颿影動懸燈夜聲繁過雨朝靜遲松
桂老堅任雪霜彫永共終南在應隨劫火燒

五言絕句

詠梭樹

唐
徐仲雅

葉似新蒲綠身如亂錦纏任君千度剥意氣自衝天

七言絕句

憑何十一少府邕覓檀木栽

唐
杜甫

草堂塹西無樹林非子誰復見幽心飽聞檀木三年大
與致谿邊十畝陰

木蓮樹

唐
白居易

如折芙蓉栽旱地似拋芍藥挂高枝雲埋水隔無人識

唯有南賓太守知

林下樗

白居易

香檀文桂苦雕鐫
生理何曾得自全
知有無材老樗否
一枝不損盡天年

紅荆

唐
元稹

庭中栽得紅荆樹
十月花開不待春
直到孩提盡驚怪
一家同是北來人

戲題樺皮

元
袁桷

褐裳新脫玉層層紅葉朱蕉謝不能擬製小冠韜短髮
意行雲水一枝藤

紀興

明

吳鼎芳

道人贏得半生閒枕上清泉座上山猶有半生閒不得
娑羅影裏叩禪關

御定佩文齋詠物詩選卷三百七十四

欽定四庫全書

御定佩文齋詠物詩選卷三百七十五

雜花類

五言古

紅花

宋文帝

紅藍與芙蓉
戎色與歡敵
莫案石榴花
歷亂聽儂摘

麗春

唐杜甫

百草競春華
麗春應最勝
少須好顏色
多漫枝條剝
紛

紛桃李枝處處總能移如何貴此種却怕有人知

崔元受少府自貶所還遺山薑花以詩答之

唐
劉禹錫

故人博羅尉遺我山薑花採從碧海上來自謫仙家雲
濤潤孤根陰火照晨葩靜搖扶桑日艷對瀛洲霞世人
受苦辛寒擷忘幽遐傳名入帝里飛驛辭天涯王濟本
尚味石崇方鬪奢堆盤多不識綺席乃增華驛馬損筋
骨貴人滋齒牙顧予藜藿士持此重咨嗟

惜郁李花

唐白居易

樹小花鮮妍香繁條軟弱高低二三尺
重疊千萬萼朝艷靄霏霏夕凋紛漠漠
辭枝朱粉細覆地紅綃薄由來好顏色
常苦易銷鑠不見葭蕩花狂風吹不落

七言古 附長短句

優鉢羅花歌

唐岑參

白山南赤山北其間有花人不識
綠莖碧葉好顏色葉六瓣花九房
夜掩朝開多異香何不生彼中國
兮生西

方移根在庭媚我公堂恥與衆草之為伍何亭亭而獨
芳何不為人之所賞兮深山窮谷委嚴霜吾竊悲陽關
道路長曾不得獻於君王

謝王參議送練春紅二枝

元 袁 桷

玉堂老仙翫幽獨閉戶無人似初溽倚闌岸幘領孤芳
菽菽輕紅冠羣綠化工有意卑凡卉積李崇桃空眩目
爭先鬪巧等堪憐已向東風盡驅逐此花清妍淨如洗
收拾餘春傲榮辱何郎湯餅徒試妝太真溫泉空賜浴

天然生色鑄真態亭午低頭睡初足誰言花后最奇絕
我怪酪奴能汙觸嫣然一笑奉清歡莫把金尊歌別鵠
并刀妙剪駢頭來珠露淋漓袖新感似嫌凡子多京塵
却恨高人付流俗微風澹蕩新雨生強拭愁容吐殘馥
擬將色筆寫清意綺語非工那忍瀆徘徊中庭月過半
翠袖娟娟泣寒玉

五言律

夏中崔中丞宅見海紅搖落一花獨開

唐
劉長卿

何事一花殘
閒庭百草闌
綠滋經雨發
紅艷隔林看
竟日餘香在
過時獨秀難
共憐芳意晚
秋露未須團

苦練花

唐
溫庭筠

院裏鶯歌歇
牆頭舞蝶孤
天香薰羽葆
宮紫暈氈蘇
暎曖迷青瑣
氤氳向畫圖
只應春惜別
留與博山爐

玫瑰

唐
唐彥謙

麝炷騰清燎
鮫紗覆綠蒙
宮妝臨曉日
錦段落東風
無

力春煙裏多愁暮雨中不知何事意深淺兩般紅

五言排律

和李舍人昆季詠冬瑰花寄贈徐侍郎

唐
盧綸

獨鶴寄煙霜雙鸞思晚芳舊陰依謝宅新艷出蕭牆蝶
散搖輕露鶯含入夕陽雨朝勝濯錦風夜劇焚香麗日
千層艷孤霞一片光密來驚葉少動處覺枝長布影期
高賞留春為遠方賞聞贈瓊玖叨和愧升堂

和李員外與舍人詠冬瑰花寄徐侍郎

唐
司空曙

仙史紫薇郎奇花共翫芳攢星排綠蒂照眼發紅光
暗妬翻階藥逢連直署香遊枝蜂繞易礙刺鳥銜妨露濕
凝衣粉風吹散藥黃蒙籠珠樹合煥爛錦屏張留客勝
看竹思人比愛棠如傳採蘋詠遠思滿瀟湘

七言律

玉燭花

唐
劉兼

裊裊香英三四枝
亭亭紅艷照階墀
正當晚檻初開處
恰似春闈就試時
少女不吹方熠燿
東君偏惜未離披
夜深斜倚朱欄外
擬把鄰光借與誰

司直巡官無諸移到玫瑰花

唐徐黃

芳菲移自越王臺
最似薔薇好並栽
穠艷盡憐勝綵繪
嘉名誰贈作玫瑰
春成錦繡風吹圻
天染瓊瑤日照開
為報朱衣早邀客
莫教零落委蒼苔

魚兒牡丹得之湘中花紅而葉白狀類雙魚累

累相比枝不能勝壓而下垂若俛首然鼻目
良可辨葉與牡丹無異亦以二月開因是得
名其幹則芍藥也予名花而賦是詩聞江東

山谷間此品甚多

宋周必大

天教姚魏主芳菲合有宮嬪次列妃玉頸圓瑳宜粉面
霞裙深染學顰衣枝頭窈窕魚雙貫風裏翩跹鳳對飛
莫把根苗方芍藥留春不似送將歸

紅錦帶花

宋楊萬里

天女風梭織露機，碧絲地上茜纒枝。
何曾繫住春歸脚，只解縈長客恨眉。
節節生花花點點，茸茸曬日日遲遲。
後園初夏無題目，小樹微芳也得詩。

詠雪球花

明陳鴻

盈盈初發幾枝寒，映戶流蘇百結團。
正恐東風先颺盡，不愁遲日易銷殘。
淡姿向曉迷蝴蝶，艷色爭春笑牡丹。
惟有三郎兒戲甚，還疑跼踖繞叢看。

五言絕句

紫荊花

唐 韋應物

雜英紛已積，含芳獨暮春。
還如故園樹，忽憶故園人。

濟之怪余久歸賦，雜言解嘲。

明 王叔承

白苧含閨怨，吳蠶五月空。
但知桑葉綠，不識茜花紅。

七言絕句

看山木瓜花

唐 劉言史

裊露凝氛紫艷新，千般婉娜不勝春。
年年此樹花開日，出盡丹陽郭裏人。

其二

柔枝濕艷亞朱欄
暫作庭芳便欲殘
深藏數片將歸去
紅縷金針繡取看

逢賈島

唐張籍

僧房逢著款冬花
出寺行吟日已斜
十二街中春雪滿
馬蹄今去入誰家

種木樹花

唐柳宗元

上苑年年占物華
飄零今日在天涯
只因長作龍城守

刺種庭前木槿花

翫迎春花贈楊郎中

唐白居易

金英翠萼帶春寒
黃色花中有幾般
憑君語向遊人道
莫作蔓菁花眼看

紫陽花

白居易

何年植向仙壇上
早晚移栽到梵家
雖在人間人不識
與君名作紫陽花

代迎春花招劉郎中

白居易

幸與松筠相近栽，不隨桃李一時開。
杏園豈敢妨君去，未有花時且看來。

南園

唐李賀

長巒谷口倚嵇家，白晝千峰老翠華。
自履藤鞋收石蜜，手牽苔絮長蘂花。

憶紫谿

唐徐凝

長憶紫谿春欲盡，千巖交映水回斜。
巖空水滿谿自紫，水態更籠南燭花。

寄山僧

唐趙嘏

雲裏幽僧不置房
椽花藤葉蓋禪牀
朝來逢著山中伴
聞說新移最上方

燕蓊花

唐李郢

十二街中何限草
燕蓊盡欲占殘春
黃花撲地無窮極
愁殺江南江北人

虎丘寺西小谿閒汎

唐皮日休

鼓子花明白石岸
桃枝竹覆翠嵐谿
分明似對天台洞

應厭頑仙不肯迷

小遊仙詩

唐曹唐

芝蕙芸花爛熳春
瑞香煙露濕衣巾
玉童私地誇書札
偷寫雲瑤暗贈人

金燈花

唐薛濤

欄邊不見葉葉砌下惟翻艷
艷叢細視欲將何物比
曉霞初疊赤城宮

金燈花

唐闕名

蘭膏熱處心猶淺銀燭燒殘焰不馨好向書生窻畔種
免教辛苦更囊螢

海仙花詩

海仙花者世謂之錦帶維揚人傳云初得於海州山谷間其枝長而花密

若錦帶然其花未開如海棠既開如木瓜而繁麗嫋嫋過之一朵滿頭冠不克荷惜其不香而無子弟可鈎壓其條移植他所因以釋草釋木驗之皆無有也近之好事者作花譜以海棠為花中神仙予謂此花不在海棠下宜以仙為號目之錦帶俚俗甚焉又取始得之地名曰海仙且賦詩三章以存其名題諸僧壁錄二

宋
王禹偁

一堆絳雪壓春叢
嫋嫋長條弄晚風
借問開時何所似
似將繡被覆薰籠

其二

何年移植在僧家
一簇柔條綴綵霞
錦帶為名俚且俗
為君呼作海仙花

次韻郁李花

宋趙抃

花縣逢春對曉暉
朱朱白白綴繁枝
梅先菊後何須校
好似人生各有時

扶桑

宋 蔡襄

谿館初寒似早春
寒花相倚媚行人
可憐萬木凋零盡
獨見繁枝爛熳新

洛城雜詩

宋 韓維

無數長條亂曉風
誰將紫錦覆春叢
殘英點落青苔面
獨倚朱欄細雨中

微雨中賞月桂獨酌

宋 陳與義

人間跌宕簡齋老
天下風流月桂花
一壺不覺叢邊盡

暮雨霏霏欲濕鴉

寶相花

宋 范成大

誰把柔條夾砌栽
壓枝萬朵一時開
為君也著詩收拾
題作西樓錦被堆

聞傅氏莊紫笑花開急掉小舟觀之

宋 陸 游

日長無奈清愁處
醉裏來尋紫笑香
漫道閒人無一事
逢春也似蜜蜂忙

閒詠園中草木

陸游

剪刀葉畔戲魚回
幘子花頭舞蝶來
領畧年光屬閒客
一樽自勸不須推

春晚邨居雜賦

陸游

鶯兒草綠侵行路
幘子花明照屋除
處處乞漿俱得酒
杖頭何恨一錢無

三峽歌

陸游

亂挿山花簪子紅
蠻歌相和灤西東
忽然四散不知處

蹋月捫蘿歸洞中

剪春羅

宋
翁元廣

誰把風刀剪薄羅
極知造化著功多
飄零易逐春光老
公子尊前奈若何

小泊英州

宋
楊萬里

人人藤葉嚼檳榔
戶戶茅簷覆土牀
只有春風不寒乞
隔谿吹度柚花香

歸自豫章復過西山

楊萬里

一眼茗花十里明
忽疑九月雪中行
我行莫笑無駒從
自有西山管送迎

新晴西園散步

楊萬里

池水初生蓋玉沙
雨餘碧草臥堤斜
日搖波影纏橋柱
繡出欒枝遍地花

山居

金
元好問

斜陽高樹挂晴虹
肅肅微涼雨氣中
一道鷺鷥花不斷
密香吹滿馬頭風

臺山雜詠

元好問

一國春風帝子家，綠雲晴雪間紅霞。
香綿穩藉僧谿草。

蜀錦驚看佛鉢花。

賦餅中雜花

予絕愛未開杏花故末篇自戲

元好問

老眼驚看節物新，今年更與酒杯親。
東山一道花如繡，從此他鄉不是春。

其二

生紅點點弄嬌妍，半拆花房更可憐。
傳語春風好將護。

莫教容易作銀錢

其三

紅抹蘭膏綠染衣
綠嬌紅小兩相宜
華邊刺有清香在
木石癡兒自不知

其四

素艷來從月姊家
溫風淑氣發清華
人間自有交枝玉
天上休開六出花

其五

昨日桃花錦片新
兔葵今日到殘春
低枝留得稀疎朵
比似全開更惱人

其六

古銅餅子滿芳枝
裁剪春風入小詩
看著海棠如有語
杏花也到退房時

雨晴

金趙秉文

一春不雨漫塵黃
碧瓦朝來汎露光
留得紫威花上露
幾招渴燕下雕梁

塞上曲

元納延

雙鬟小女玉娟娟自捲氈簾出帳前忽見一枝長十八
折來簪在帽簷邊

三月廿日題所寓屋壁

元倪瓚

梓樹花開破屋東鄰牆花信幾番風閉門睡過兼旬雨
春事依依是夢中

登雙鳳普福宮東樓贈吳道傳時周境存隱君

同席

元王逢

樓殿岩堯上赤霞水紋蟠鳳臥靈槎石碁盤靜香煙直
簾下雙頭百合花

粉團花下夜飲

元 錢惟善

萬花碎剪玉團團晴雪飛香夜不寒恰似玉人相對立
酒尊移月近前看

上京次貢待制韻

元 涂穎

海風吹雨度龍沙滿眼金蓮紫菊花日暮笙歌何處起
高低穹帳五侯家

謾成

元馬臻

槐陰滿院喧巢鴉
蜜房香老蜂趨衙
鄰家艇子釣魚去
水光搖動金蓮花

嶺南雜詠

明汪廣洋

榕樹陰陰集暮鴉
竹深人靜似仙家
芭蕉小苑垂雙實
茉莉南州壓萬花

南唐故址

明葉子奇

唐主宮垣集暝鴉
垣邊幾座野人家
尚餘一片繁華地

宜種紅藍內苑花

發淮安

明
楊士奇

岸蓼疎紅水荇青
茨菰花白小如萍
雙鬟短袖慙人見
背立船頭自採菱

秀上人課經圖

明
銍泰

山繞清谿樹繞亭
隔雲金磬曉泠泠
道人不管花開落
白乳香中讀觀經

訪包山徐德彰

明
陳寬

青山湖上是君家有約來看巨勝花
蹋破白雲秋一片
不知還隔幾重霞

畫了蘭

明
陸治

玉戟稜稜應節分
枝枝柔玉紉香雲
凝妝擬待三更月
露染生綃六幅裙

馬蘭花

明
舒芬

金氣稜稜澤國秋
馬蘭花發滿汀洲
富春山下連魚屋
采石江頭映酒樓

虞美人

明孫齊之

薔薇開盡綠陰涼
西國名花此際芳
夜月空懸漢宮鏡
幽姿猶帶楚雲妝

御定佩文齋詠物詩選卷三百七十五

欽定四庫全書

御定佩文齋詠物詩選卷三百七十六

藥類

五言古

和紀叅軍服散得益

齊謝朓

金液稱九轉
西山歌五色
鍊質乃排雲
濯景終不測
雲英亦可餌
且駐羲和力
能令長卿卧
暫故遇真識

憇郊園和約法師採藥

梁沈約

郭外三千畝欲以貿朝饘繁蔬既綺布密果亦星懸

採藥遊名山

陳劉 刪

名山本鬱盤道士貴黃冠獨馭千年鶴來尋五色丸石
牀新溜乳金竈欲成丹定知無二價非復在長安

種藥

唐韋應物

好讀神農書多識藥艸名持鱣購山客移時羅衆英不
改幽澗色宛如此地生汲井既蒙澤挿援亦扶傾陰穎
夕房斂陽條夏花明悅翫從茲始日夕繞庭行州民自

寡訟養閒非政成

山居新種花藥與道士同賦

唐錢起

自樂魚鳥性寧求農牧資淺深愛巖壑疏鑿盡幽奇
雨花相助好鶯鳴春艸時種蘭入山翠引葛上花枝
風露拆紅紫緣谿復映池新泉香杜若片石隱江蘼
宛謂武陵洞潛應造化移杖策攜煙客滿袖掇芳蕤
蝴蝶舞留我仙雞閒傍籬但令黃精熟不慮韶光遲
笑指雲蘿逕樵人那得知

藥草

唐蘇拯

天子卹疲瘵坤靈奉其職年年濟世功貴賤相兼植因
產衆艸中所希采者識一枝當若神千金亦何直生草
不生藥無以彰土德生藥不生草無以彰奇特國忠在
臣賢民患憑藥力靈艸猶如此賢人豈多得

擬古寄何太卿

宋謝翱

世聞賣藥翁出市恒騎虎竭來空山中恨不輒與語長
嘯歸無家獨指梧桐樹既指梧桐樹復採梧桐子持以

贈所思浩歌聊復爾

謝子靜寄端午藥煎

謝翺

麴桃弄朝煙舍蟲鍊百杵山人入藥錄搥日月逢午甘
酸雜衆味能生玉池乳頗憶越吟人性靜無所苦中年
白髮生寄以潤肺腑為謝山中人願結山中侶

採藥

元許謙

亭亭北山松宿藹深碧蒼根走虬龍巨榦蟠鐵石平
生棟梁具不受霜雪厄兔絲得所附裊裊掛千尺流脂

入九地千載化琥珀我欲掇其英俯仰費搜擿紅爐轉
丹砂石髓變金液但恐茫昧間圖驥不可索意長時苦
促雙髻日夜白刀圭或可試習習在兩腋蓬萊三萬里
詎謂弱水隔他時來山中故老應不識

詠東漢高士封君達

元張雨

入山服黃連還鄉騎青牛借得五岳圖一去三千秋

題金華宗原常雙谿洗藥圖

明吳溥

洗藥臨谿頭水流谿尾香居人飲谿水百年躋壽康石

路曲盤蛇山花如錦黃日暮携藥歸香風滿衣裳

七言古

鋤藥詠

唐錢起

蒔藥穿林復在巘濃香秀色深能淺雲氣垂來裛露偏
松陰古處知春晚拂曙殘鶯百轉催繁泉帶石幾花開
不隨飛鳥緣枝去如笑幽人出谷來對之不覺忘疎嬾
廢卷荷鋤嫌日短豈無萱艸樹堦墀惜爾幽芳世所遺
但使芝蘭出蕭艾不辭手足皆胼胝寧學陶潛空嗜酒

顏齡捨此事東菑

採藥晚歸因宿野人草舍

宋文同

東巖陰深崖巘古
夾澗垂泉結鸞乳
我來採藥晚忘歸
試宿荆扉問雞黍
春風滿林燈火冷
一夜不眠山月苦
平明攜策下青蒼
松葉紛紛灑新雨

五言律

月下洗藥

唐錢起

汲井向新月
分流入衆芳
濕花低桂影
翻葉靜泉光
露

下添餘潤蜂驚引暗香
寄言養生客來此共提筐

清旦題採藥翁草堂

唐 溫庭筠

幽人尋藥徑來自曉雲邊
衣濕木花雨語成松嶺煙解
藤開澗戶踏石過谿泉林外
晨光動山昏鳥湍天

夏日

宋 張耒

種藥幽人事還披本草經
出山拋舊翠過雨有新青
術受壺中秘方傳肘後靈
不辭勤服餌為變髮星星

五言排律

春過賀遂員外藥園

唐王維

前年槿籬故新作藥欄成香草為君子名花是長卿水
穿盤石透藤繫古松生畫畏開厨走來蒙倒屣迎蔗漿
菰米飯蒟醬露葵羹頗識灌園意於陵不自輕

七言律

重玄寺元達年逾八十好種名藥凡所植者多
至自天台四明包山句曲叢萃紛糅各可指
名余竒而訪之因題二章

唐皮日休

雨蓂煙鋤偃僂齋紺牙紅甲兩三畦藥名却笑桐君少
年紀翻嫌竹祖低白石靜馱蒸朮火清泉閒洗種花泥
怪來昨日休持鉢一尺雕胡似掌齊

其二

香蔓蒙籠覆昔邪檜烟杉露濕袈裟石盆換水撈松葉
竹逕遷牀避笋芽藜杖移時挑細藥銅瓶盡日灌幽花
支公謾道憐神駿不及今朝種一麻

和題達上人藥圃

唐
陸龜蒙

藥味多從遠客齋旋添花圃旋成畦三桮舊種根因異
九節初移葉尚低山筴便和幽澗石水芝須帶本池泥
從今直到清秋日又有香苗幾番齊

其二

淨名無語是清羸草藥搜來喻更微一雨一風皆遂性
花開花落盡忘機教疏兔縷金絃亂自擁龍芻紫汞肥
莫怪獨親幽圃坐病容消盡欲依歸

分得藥臼謝醫

明沈周

山人治藥斫雲根，枵腹中容海月吞。
搗過砂牀剝朱糝，煉餘石髓膩青痕。
無銘錯認周王鼓，有竅真移玉女盆。
抱疾人來識清杵，數聲遙在杏花村。

五言絕句

藥圃

唐錢起

春畦生百藥，花葉香初霽。
好客似風光，偏來入叢蕙。

酬澹上人採藥見寄

唐劉商

玉英期共采雲嶺，獨先過應得靈芝也。
詩情一倍多。

藥園

唐司空曙

春園芳已遍綠蔓雜紅英獨有深山客時來辨藥名

房君珊瑚散

唐李商隱

不見嫦娥影清秋守月輪月中閒杵臼桂子擣成塵

藥園

唐夏侯子雲

綠葉紅英遍仙經自討論偶移巖伴菊鋤斷白雲根

贈華山遊人

唐毛女正美

藥苗不滿筍又更上危巔回首歸去路相將入翠煙

洗藥池

元趙孟頫

真人栖隱處洗藥有清池金丹要沐浴玉水自生肥

紫軒

趙孟頫

林君已仙去紫軒名尚存丹光時或現藥鼎夜常溫

香陰

明僧通潤

山中多藥苗往往發香氣不知採藥人曾嗅此香未

七言絕句

絕句

唐杜甫

藥條藥甲潤青青色過棕亭入草亭苗滿空山慚取譽
根居隙地怯成形

送僧往金州

唐 張 籍

聞道漢陰山水好師行一一徧經過事須覓取堪居處
若箇谿頭藥最多

招周處士

張 籍

閉門秋雨濕牆莎俗客來稀野思多已掃書堂安藥竈
山人作意早經過

酬孝甫見贈十首各酬本意次用舊韻

錄一

唐
元稹

一自低心翰墨場
箭筈拋盡負書囊
近來兼愛休糧藥
柏葉莎蘿雜豆黃

題龍池山人

唐
施肩吾

主人家在龍池側
水中有魚不敢食
終朝采藥供仙廚
却笑桃花少顏色

自遣

唐
陸龜蒙

無多藥圃近南榮
合有新苗次第生
穉子不知名品上
恐隨春草闢輸贏

宗人惠四藥

唐鄭谷

宗人忽惠西山藥
四味清新香助茶
爽得心神便騎鶴
何須燒得白朱砂

山邨經行因施藥

宋陸游

逆旅人家近野橋
偶因秣蹇暫逍遙
邨翁不解讀本州
爭就先生辨藥苗

采藥徑

宋趙師秀

十載仙家采藥心
春風過了得幽尋
如今縱有相逢處
不是桃花是綠陰

賣藥翁

元馬臻

山人本在山中住
偶向城中賣藥去
不道石潭龍出雲
失却朝來下山處

訪柱上人

明徐賁

經院深深久護烟
雨中藥艸午涼天
古香室裏人重到

恰似秋風五日前

御定佩文齋詠物詩選卷三百七十六

欽定四庫全書

御定佩文齋詠物詩選卷三百七十七

人參類

五言古

人參

宋蘇軾

上黨天下脊遼東真井底玄泉傾海腴白露灑天醴靈
苗此孕毓肩股或具體移根到羅浮越水灌清泚地殊
風雨隔臭味終祖禰青稭綴紫萼圓實墮紅米窮年生

意足黃土手自啓上藥無炮炙齟齬盡根柢開心定魂魄憂恚何足洗糜身輔吾軀既食首重稽

紫團參寄王定國

蘇軾

谿訝土門口突兀太行頂豈惟團紫雲實自俯倒景剛風被草木真氣入苔蘚舊聞人銜芝生此羊腸嶺纖纖虎豹鬣感縮龍蛇癭蠶頭試小嚼龜息變方騁矧子明真子已造浮玉境清宵月掛戶半夜珠落井灰心寧復然汗喘久已靜東坡猶故日北藥致遺秉欲持三桮根

往侑九轉鼎為予置齒頰豈不賢酒茗

效孟郊體

宋謝翱

移參窗北地經歲日不至悠悠荒郊雲背植足陰氣新
雨養陳根乃復佐藥餌天涯葵藿心憐爾獨種參

七言律

友人以人參見惠因以詩謝 唐皮日休

神草延年出道家是誰披露記三桮開時的定涵雲液
劉後還應帶石花名士寄來消酒渴野人煎處撇泉華

從今湯劑如相續不用金山焙上茶

和襲美謝友人惠人參

唐陸龜蒙

五葉初成椶樹陰紫團峰外即雞林名參鬼蓋須難見
材似人形不可尋品第已聞升碧簡攜持應合重黃金
慇懃潤取相如肺封禪書成動帝心

七言絕句

送客之潞府

唐韓翃

官柳青青匹馬嘶迴風暮雨入銅鞮佳期別在春山裏

應是人參五葉齊

與周為憲求人參

唐
段成式

少賦令才猶強作衆醫多識不能呼九莖仙草真難得
五葉靈根許惠無

以人參遺段柯古

唐
周
繇

人形上品傳方志我得真英自紫團慚非叔子空持藥
更請伯言審細看

送上黨長

宋
謝
翱

春雨人參長紫苗
縣庭無事坐終朝
俯看雲氣千山表
野有新田市有謠

御定佩文齋詠物詩選卷三百七十七

欽定四庫全書

御定佩文齋詠物詩選卷三百七十八

茯苓類

五言律

路逢襄陽楊少府入城戲呈楊員外綰

唐杜甫

寄語楊員外山寒少茯苓歸來稍暄暖當為劇青冥翻
動神仙窟封題鳥獸形兼將老藤杖扶汝醉初醒

欽定四庫全書

欽定四庫全書
卷三百七十八

七言律

病中宜茯苓寄李諫議

唐 吳融

千年茯苓帶龍鱗太華峰頭得最珍
金鼎曉煎雲漾粉玉甌寒貯露含津
南宮已借徵詩客內署今還托諫臣
飛檄愈風知妙手也須分藥救漳濱

七言絕句

贈鶴林上人

唐 戴叔倫

日日澗邊尋茯苓巖扉常掩鳳山青
歸來挂衲高林下

自剪芭蕉寫佛經

送阿龜歸華陽

唐 李商隱

草堂歸意背煙蘿
黃綬垂腰不奈何
因汝華陽求藥物
碧松根下茯苓多

游仙詞

元 張 雨

應見霓裳舞廣庭
罷看三十九章經
道人腰著金鴉嘴
自向松根洗茯苓

贈伯清

元 倪 瓚

市上休疑張伯清藥無二價制顏齡何當掃雪居幽谷
與我松根採茯苓

御定佩文齋詠物詩選卷三百七十八

欽定四庫全書

御定佩文齋詠物詩選卷三百七十九

黃精類

五言古

餌黃精

唐
韋應物

靈藥出西山服食採其根
九蒸換凡骨經著上世言
候火起中夜馨香滿南軒
齋居感衆靈藥術啟妙門
自懷物外心豈與俗士論
終期脫印綬永與天壤存

再賦天池

元張雨

巖從古墩丘泓潭浸其股金碧爭蕩磨穿穴稍旁午斬
松羅石榻玄芝錯神許遙應玉女盆潤及黃精圃

七言絕句

期王鍊師不至

唐秦系

黃精蒸罷洗瓊杯林下從留石上苔昨日圍碁未終局
已乘白鶴下山來

寄王奉御

唐張籍

愛君紫閣峯前好新作書堂藥竈成見欲移居相近住
有田多與種黃精

黃精鹿

書父宣畫

宋

蘇軾

太華西南第幾峯落花流水自重重幽人只採黃精去
不見青山鹿養茸

雪曉懷西清田舍

明

楊承鯤

種來黃獨已如拳手劚冰膚煮澗泉酒醒雪晴無一事
竹窓炊火送新煙

御定佩文齋詠物詩選卷三百七十九

欽定四庫全書

御定佩文齋詠物詩選卷三百八十

山茱萸類

五言律

奉御札賦茱萸詩

宋 徐鉉

萬物慶西成
茱萸獨擅名
房排紅結小
香透夾衣輕
宿露霑猶重
朝陽照更明
長和菊花酒
高晏奉西清

七言律

奉和御製茱萸

宋 徐鉉

臺畔西風御果新
芳香精彩麗蕭辰
柔條細葉粧治好
紫蒂紅芳點綴勻
幾朵得陪天上宴
千株長作洞中春
今朝聖藻偏流詠
黃菊無由更敢鄰

五言絕句

山茱萸

唐 王維

朱實山下開
清香寒更發
幸與叢桂花
牕前向秋月

茱萸泚

王維

結實紅且綠復如花更開山中倘留客置此芙蓉杯

茱萸泚

唐
裴迪

飄香亂椒桂布葉間檀藥雲日雖回照森沈猶自寒

七言絕句

秋園

唐
司空曙

傷秋不是惜年華別憶春風碧玉家強向衰叢見芳意
茱萸紅實似繁花

御定佩文齋詠物詩選卷三百八十

欽定四庫全書

御定佩文齋詠物詩選卷三百八十一

檳榔類

五言古

忽見檳榔

北周庾信

綠房千子熟紫穗百花開
莫言行萬里曾經相識來

食檳榔

宋蘇軾

月照無枝林夜棟立萬礎
眇眇雲間扇蔭此九月暑上

有垂房子下統絳刺禦風欺紫鳳卵雨暗蒼龍乳裂包
一墮地還以皮自煮北客初未諳勸食俗難阻中虛畏
泄氣始嚼或半吐吸津得微甘著齒隨亦苦面目太嚴
冷滋味絕媚嫵誅彭勲可策推轂勇宜賈瘴風作堅頑
導利時有補藥儲固可爾果錄詎用許先生失膏梁便
腹委敗鼓日啖過一粒腸胃為所侮蟄雷殷臍腎黎藿
腐亭午書燈看膏盡鉦漏歷歷數老眼怕少睡竟使赤
皆弩渴思梅林嚙飢念黃獨舉奈何農經中收此困羈

旅牛舌不餉人一斛肯多與乃知見本偏但可酬惡語

初食檳榔

明劉基

檳榔紅白文包以青扶留驛吏勸我食可已瘴癘憂初
驚刺生頰漸若戟在喉紛紛花滿眼岑岑暈蒙頭將疑
誤腊毒復想致無由稍稍熱上面輕汗如珠流清涼徹
肺腑粗穢無纖留信知殷王語瞑眩疾乃瘳三復增永
歎書之遺朋儔

七言絕句

檳榔五絕卒章戲簡及之主簿

宋
朱子

暮年藥裏關身切此外脩然百不貪
葦以載來緣下氣
檳榔收得為祛痰

其二

錦文縷切勸加餐
蜃炭扶畱共一盤
食罷有時求不得
英雄邂逅亦饑寒

其三

向來試吏著南冠
馬甲蟾山得飫餐
却藉芳辛來解臠
雞心磊落看堆盤

其四

箇中有味要君參
螫吻春喉久不甘
珍重人心亦如此
莫將寒苦換春酣

其五

高士沈迷簿領書
有時紅糝綴玄鬚
定知不著金盤貯
兒女心情本自無

嶺南雜詠

明 汪廣洋

海濱朝夕易炎涼
濕氣蒸人沁薄裳
昨日崖州有船到
滿城爭買白榴榔

御定佩文齋詠物詩選卷三百八十一

欽定四庫全書

御定佩文齋詠物詩選卷三百八十二

枳殼類

五言絕句

訪客舟中

明
陳憲章

船中酒多少船尾閣春沙
恰到谿窮處山山枳殼花

七言絕句

商州王中丞留喫枳殼

唐
朱慶餘

方物就中名最遠只應愈疾味偏嘉若教盡喫人人與
采盡高山枳殼花

城西訪友人別墅

唐
雍陶

澧水橋西小路斜日高猶未到君家邨園門巷多相似
處處春風枳殼花

寄襄陽章孝標

雍陶

青油幕下白雲邊日日空山夜夜泉聞說小齋多野意
枳花陰裏麝香眠

題石田翁贈朱守拙小景

明陳蒙

野藤刺水竹籬斜落盡東風
枳殼花日午不聞茶臼響
春城買藥未還家

御定佩文齋詠物詩選卷三百八十二

欽定四庫全書

御定佩文齋詠物詩選卷三百八十三

枸杞類

五言古

井上枸杞架

唐
孟郊

深鎖銀泉甃高葉架雲空不與凡木並自將仙蓋同影
疎千點月聲細萬條風逆子隣溝外飄香客位中花杯
承此飲椿歲小無窮

枸杞

宋
蘇軾

神藥不自閼羅生滿山澤日有牛羊憂歲有野火厄越
俗不好事過眼等茨棘青篋春自長絳珠爛莫摘短籬
護新植紫笋生卧節根莖與花實收拾無棄物大將玄
吾髻小則餉我客似聞朱明洞中有十歲質靈厖或夜
吠可見不可索仙人倘許我借杖扶衰疾

七言律

楚州開元寺枸杞臨井繁茂可愛

唐
劉禹錫

僧房藥樹依寒井井有香泉樹有靈
翠黛葉生籠石甃
殷紅子熟照銅瓶
枝繁本是仙人杖
根老新成瑞犬形
上品功能甘露味
還知一勺可延齡

枸杞

宋
楊萬里

芥花菰苓餞春忙
夜吠仙苗喜晚嘗
味抱土膏甘復脆
氣含風露噉猶香
作蘼淡著微施酪
茗茗臨時莫過湯
却憶荆谿古城上
翠條紅乳摘盈箱

七言絕句

和郭使君題枸杞

唐白居易

山陽太守政嚴明，吏靜民安無犬驚。
不知靈藥根成狗，怪得時聞吠夜聲。

御定佩文齋詠物詩選卷三百八十三

欽定四庫全書

御定佩文齋詠物詩選卷三百八十四

決明類

五言古

種決明

宋
黃庭堅

后皇富嘉種決明注方術耘耔一席地時至觀茂密縹
葉資芰羹緗花馬蹄實霜叢風雨餘簸簸場功畢枕囊
代曲肱甘寢聽芬苾老眼願力餘讀書真成癖

決明

明
吳寬

黃花隱綠葉雨過仍離披不為杜老歎未是涼風時服
食治目青吾將採掇之不須更買藥園丁是醫師

七言律

次韻濟之謝送決明

明
吳寬

畦間香露正氤氲童子清晨荷鋤勤不惜離披垂翠羽
端愁搖動落黃雲藥名再得宣公註書帶休從鄭老分
病日向來俱有賴涼風吹汝莫紛紛

御定佩文齋詠物詩選卷三百八十四

欽定四庫全書

御定佩文齋詠物詩選卷三百八十五

藥名詩類

五言古

藥名

齊
王融

重臺信嚴敞
陵澤乃閒荒
石蠶終未蠶
垣衣不可裳
秦
芎留近詠
楚蘅摺遠翔
韓原結神艸
隨庭銜夜光

五言律

山家小憩即景效藥名體

宋戴昺

柴門通艸徑茅屋桂枝間
修竹連翹木高松續斷山
仰空青蔭密掃石綠花斑
傍澗牽牛飲白頭翁自閑

五言排律

藥名聯句

唐皮日休

為待防風餅須參薏苡杯

張翥

香燃柏子後樽泛菊花來

皮日休

石耳泉能洗垣衣雨為裁

陸龜蒙

從容犀局靜續斷

玉琴哀

賁

白芷寒猶採青箱醉尚開

皮日休

馬銜衰艸卧烏

啄蠹根迴

龜蒙

雨過蘭芳好霜多桂末推

賁

朱兒應作粉

雲母詎成灰

日休

藝可屠龍膽家曾近驚胎

龜蒙

牆高牽薜

荔障軟撼玫瑰

賁

鷗鼠啼書戶蝸牛上硯臺

日休

誰能將

藁本封與玉泉才

龜蒙

五言絕句

藥名詩

元

陳高

丈夫懷遠志兒女苦參商
過海防風浪何當歸故鄉

七言絕句

藥名詩

唐 權德輿

七澤蘭芳十里春
瀟瀟花落石磷磷
有時浪白微風起
坐釣藤陰不見人

答鄱陽客藥名詩

唐 張籍

江皋歲暮相逢地
黃葉霜前半夏枝
子夜吟詩向松桂
心中萬事喜君知

御定佩文齋詠物詩選卷三百八十五